

四庫全書

集部

欽定四庫全書

集部

懷星堂集卷十七

詳校官監察御史臣曹坦

中書臣劉源溥覆勘

總校官庶吉士臣何思鈞

校對官中書臣朱炘

校對官中書臣王鍾忝

謄錄貢生臣陳昌敬

謄錄監生臣畢所誦

欽定四庫全書

懷星堂集卷十七

明 祝允明 撰

傳志

封刑部主事伊公傳

伊氏出阿衡而伊水在洛陽之南今淮安府之沭陽縣
則有大小伊山伊水經焉而大姓伊氏居之蓋山以有
水故名伊氏自其世居意或者居者大而久山由以名
未可知也至宋都南移細四府君始遷于吳五世孫元

裕生嗣賢在國初又遷建康生彤封尚寶少卿少卿生
恒悌恒侍仁宗皇帝于監國時仁宗即位授工部營繕
所正命待詔思善門英宗皇帝即位特勅授尚寶少卿
悌性通廣有才辯多交名輩是生公公溥字紹方敏
而好學篤人倫勇為義胸度醇厚而中抱氣節不苟從
時低昂事親睦族御家有禮先丘在吳查山姦人計噬
之宰木刈而赭愬諸官復之加以封樹猶子少孤待若
所生田之在吳者僅三十畝族人弼女懼其失身也舉

租贖歸嫁之吳毗以貧將棄妻張寧將賣女各資給之
賴以完浦君闔室疫姻友削迹獨數往視迄無染一丈
夫子曰乘德學懋肖而愛勞之尤切乘舉進士官南京
刑部主事既家于京四世矣羣從數十人姻屬滋蔓不
能無干請先生一切嚴絕不以及刑部刑部益得充其
守刑部遷四川按察僉事臨江送之示之詩以張文紀
趙閱道為厲以趙嘗仕蜀而張蜀人也僉事政譽益佳
及一考以工程便省裝無蜀物則為之甚喜比僉事入

奏事竣當復任面乞歸養上特允之僉事歸公又喜公素往來京吳投老止姑蘇居閭門外小曲僉事日侍左右驩然終日公觀時貴遷躐之速園廬服御之盛一不動于中二孫伯熊伯羔游業京學撫教尤至每入試輒往視試不捷亦不愠尚德憐才渴若弗及在晚後者忘年相與眉宇中申和氣盎溢然不詔鬼神不信佛老其執毅然今八十五矣手卷不釋燭下讀書作字徒步數十里陟山顛不少倦每有興寄發之篇章溫厚典雅有

唐人之度以京第近天闕山自號天闕山樵號詩伐柯
吟橐凡數百篇祝允明曰甚哉伊世之濟美也建康之
作譜金學士問叙之封君之葬王文瑞公直銘之學士
又傳之思存之歿劉大參昌銘之周先生鼎傳之其他
不勝紀好是懿德誰非樂道焉非鄉人之好也於乎豈
惟人哉固多有出之絲綸之言者而天之意方灼灼也
余於公年殆幼以倍而公過之過每別去未始不追想
彌日恒欲紀錄其言履可為倣依會提刑有請而成此

愧弗類也大抵德人往往善興起人伯夷柳下惠有以起百世之下者公德多端抑其和而介者則羣懿之榦夫則其起夫人也殆不猶展公之徒與於乎惠聖人也允明曰聖人予不得而見之矣得見君子者斯可矣

陳公季昭墓誌銘

吾郡有陳公季昭氏藝畫六十年遠近知畫者莫不知有姑蘇陳季昭既沒其家請誌墓之文於予予感重焉蓋自昊羲之水火倉史之日月立象垂文以窮理御事

而書畫起可聲曰書徒形曰畫語其上則形聲皆贅也
以不可偏廢者則其究至于絲髮不可畧矣其若一筆
一點脫驪黃易牝牡曰在神不在質者或一理也而非
其全矣公之畫不然人必耳目室必梁棟非古人無師
非定見無發若限而不滯若質而有味比於工事不為
飛題浮楹而青陽總章可累而致也亦藝之成者歟公
性氣慤簡不喜觀世事寡出戶庭仕者請畫多不予曰
彼將與巾幣同棄於懂懂者郡大夫致鄉飲酒一與永

辭曰其殆以吾以藝為酬酢乎吾不能卻焚然之求矣
居舍側隘或曰力可稍廣乎曰吾志不於是匪力故也
性且孝一生凡三割股救大父母母疾而母功尤深一
時耆德如東原先生輩多友重焉弘治初年八十詔賜
冠帶後一紀歲行丙辰十二月某日無病而逝春秋九
十二矣其生永樂丙戌七月某日公諱暹字季昭貫吳
縣父希昌母王氏配某氏子男三曰崑巴崑女三孫男
一曰奎女三曾孫男一曰慈葬以明年九月某日墓在

武丘鄉曹巷銘曰

藝士也成行士也貞其亦可謚於先生矣

潘公孟誠夫婦合祔之碑

家以德久以禮義振以文顯主者知之配者成之如是也合焉而謂之大不爽也蓋嘗稽之往往而然吳邑香山之柳溪有潘氏自其里稱之曰大家廣而之鄉之邑則莫不然吾聞之久矣一旦其塾師徐君正夫以其家葬文事來告讀徐君狀而犁然信前語不爽也狀曰潘

故湖人宋元以來一徙吳縣垓村里再徙今地在國初則已長鄉賦為鄉族最至懷德府君澤仁承先德先事益大之娶于朱生三子其伯曰孟誠甫則今之將葬者也其諱諫抱賦敏重幼便不羣弱冠繼父事公事先輩同父事者推其父為有子也既而與仲季治產作業益隆然恢濶然持之以禮義孝友悃悃周仁喜施築甬濟涉其可見者居處樸與人誠嘗自稱曰好古人與其為果然也懷德君既以壽大耋受國養之典錫被冠帶孟

誠亦已杖國猶共老萊氏之職不哀後十年始病痰隔以卒則弘治乙卯三月己亥也享春秋八十一載矣鄉人歆其年而悲其善焉其配魏氏諱懿真亦塘灣名家父宗德母張氏生魏具婦德莊勤惠柔宜家式族其卒先孟誠一年甲寅十一月庚寅也年八十三茲以丁巳十一月甲寅合祔先兆穹窿山大院嶺右狀云爾嗚呼是所謂以德久而禮義振者非與其稱大鄉邑不繆宜文以顯惜余未之盡耳然而不可辭孟誠有一子曰綱

為義官後父一年而卒女嫁葉鮮亦卒一孫曰鉞娶范女許嫁呂氏一曾孫幼其從子叙等相鉞共治大事叙是以從徐君來銘曰

善也餘其身無畢陳陳以告未聞社也離之盡無留恨言以慰族脣高山厚土雙玉殯豐碑有揭讀者信

文林郎南京光祿寺署丞李公夫婦合祔誌銘

李公諱浩字景洪吳人父伯盛母張氏公資賦峻確十
四入郡學無外習已而中鄉試會試落副榜不就選入

太學久之授太常寺典簿廳典簿司樂某考滿無他過
法應致仕公為規援得復任某密懷白金餽謝力辭之
成化乙酉詔纂先帝實錄堂委公脩本寺書書成上之
丙寅上書列卿及工人各奏保為本寺丞皆不報尋授
勅命進階贈父官封母及妻徐皆孺人又久之丁內憂
起復赴銓踰四年裁改光祿寺珍羞署署正明年前官
復職而南京適有是官缺又調公補之奏乞添廚役月
糧疏再上不果從居亡何以病在告淹彌經歲遂歸吳

屏跡息交不涉公府閭里亦罕見顏面甲寅之歲重得疾乃以七月辛亥卒於家公負氣不肯委附逐時故在仕地匿蹇戾契不得申雖常格所得猶淹回不即得而終不以奪氣性顛顛記纂大官之選伺時既久居京邸無政務不能自逸因取司馬氏通鑑朱氏綱目為本又上獵尚書史記下逮宋元史本朝續通鑑綱目統會之以君紀臣傳分部摘其事略從朱氏例節書而以先輩論釋萃系其下時附著已見為書名曰通鑑斷議凡二

百四十三卷弘治初上諸朝優詔答之兼賜楮幣奉常
時彙總寺事疏條為六卷題曰太常總覽又集本朝輿
地圖乘及禮樂官爵制度政目刑條諸定格之略為大
明制略二十卷又有書傳評義二十卷并他脩齊銓訓
成編者尚多其勤可知也公生以洪熙乙巳六月朔享
年七十子男二曰瑄曰瑄女一孫男二曰大有同人女
四瑄輩以卒後四月壬寅為十一月十七日奉葬於縣
郭橫山之塋以徐孺人祔孺人諱素芳亦具婦行甚勤

與公齊年誕稍遲曰十二月十七日卒先一年乃癸丑
十月八日瑄奉太學生翁君狀來求銘銘曰

稱德者驥亦既駢駟胡然踳躅曾莫謝以愜脩業維勤
亦允其懿而又頃逝宜嘆噴忌尚千百斯祀式奠玄位
以偕厥儷

唐子畏墓誌并銘

子畏死余為歌詩往哭之慟將葬其弟子重請為銘子
畏余肺腑友微子重且銘之子畏性絕穎利度越千士

世所謂穎者數歲能為科舉文字童髻中科第一日四海驚稱之子畏不然幼讀書不識門外街陌其中屹屹有一日千里氣不或友一人余訪之再亦不答一旦以二章投余傑特之志錚然余亦報以詩勸其少加弘舒言萬物轉高轉細未聞華峰可建都聚惟天極峻且無外故為萬物宗子畏始肯可久乃大契然一意望古豪傑殊不屑事場屋其父德廣賈業而士行將用子畏起家致舉業歸教子畏子畏不得違父旨德廣嘗語

人此兒必成名殆難成家乎父沒子畏猶落落一日余謂之曰子欲成先志當且事時業若必從己願便可褫襤褸燒科策今徒籍名泮廬目不接其冊子則取舍柰何子畏曰諾明年當大比吾試捐一年力為之若弗集一擲之耳即墮戶絕交往亦不見時輩講習取前所治毛氏詩與所謂四書者緝討擬議祇求合時義戊午試應天府錄為第一人已未往會試時傍郡有富子亦已舉于鄉師慕子畏載與俱北既入試二場後有仇富子

者抨于朝言與王司有私并連子畏詔馳勅禮闈令此
主司不得閱卷亟捕富子及子畏付詔獄逮主司出同
訊于廷富子既承子畏不復辯與同罰黜掾于浙藩歸
而不往或勸少貶異時亦不失一命子畏大笑竟不行
放浪形迹翩翩遠游扁舟獨邁祝融匡廬天台武夷觀
海於東南浮洞庭彭蠡整歸將復踏四方得疾久少
瘡稍治舊緒其學務窮研造化玄蘊象數尋究律歷求
揚馬玄虛邵氏聲音之理而贊訂之傍及風鳥壬遁太

乙出入天人之間將為一家學未及成章而沒其於應
世文字詩歌不甚措意謂後世知不在是見我一班已
矣竒趣時發或寄于畫下筆輒追唐宋名匠既復為人
請乞煩雜不休遂亦不及精諦且已四方慕之無貴賤
貧富日詣門徵索文辭詩畫子畏隨應之而不必盡所
至大率興寄遐邈不以一時毀譽重輕為趣舍子畏臨
事果事多全大節即少不合不問故知者誠愛寶之若
異玉珍貝王文恪公最慎與可知之最深重不知者亦

莫不歆其才望而媚疾者先後有之子畏糞土財貨或
飲其惠諱且橋樂其菑更下之石亦其得禍之由也桂
伐漆割害儻戕特塵土物態亦何傷于子畏余傷子畏
不以是氣化英靈大畧數百歲一發鍾于子子畏得之
一旦已矣此其痛宜如何置有過人之傑人不歆而更
毀有高世之才世不用而更擯此其冤宜如何已子畏
為文或麗或澹或精或泛無常態不肯為鍛鍊功其思
常多而不盡用其詩初喜穠麗既又效白氏務達情性

而語終璀璨佳者多與古合嘗乞夢仙游九鯉神夢惠之墨一擔蓋終以文業傳焉唐氏世吳人居吳趨里子畏母丘氏以成化六年二月初四日生子畏歲舍庚寅名之曰寅初字伯虎更子畏卒嘉靖癸未十二月二日得年五十四配徐繼沈生一女許王氏國士履吉之子墓在橫塘王家村子畏惟禍後歸心佛氏自號六如取四句偈旨治圃舍北桃花塢日般飲其中客來便共飲去不問醉便頽寢子重名申亦佳士稱難弟兄也銘曰

穆天門兮夕開紛吾乘兮歸來睇桃夭兮故土回風衝
兮蘭玉推不班率兮猶裴回星辰下上兮雲雨灌椅桐
輪囷兮稼無滯穉孔翠錯璨兮金芝歲蕤碧丹淵涵兮
人間望思

秋月生小傳

秋月生幼讀儒家書兼通律歷五行諸家以其緒餘賣
卜推祿命往往奇中文余家最久余幼比長習接焉以
為良術師耳後接益密得其所存甚宜恭以親生事母

孝家庭雍睦既洞識天造物理御其身欣戚愛憎一不
寘於中居暇時每獨坐鼓琴嚼杯吹洞簫長笛作一兩
曲興寄悠然不測客來燒香與圍棋握槊小醉而解或
時拄杖頭數十錢浪步以游或便登山臨水視時以財
官雄者眇如也生業既精余極欲與討論以求未至恨
多事浸浸遠去未能間興懷慕因畧述大技投之觀
異時終余志生氏李字文榮自稱秋月生或以謂鑒別
理數之況然生之本意未可知

贊曰人慕外輒出位擬禍患以不知命至知者尤患焉
達矣秋月生知而遂之嘻安得人盡生生之業他日必
有以名者

燕山三氏小述

一人曰杜謹言符畜竒氣孛孛木火成性通明亢升物
不得揜之自研磨要理兼總形實將施利當世假令遂
順將無煩究盡足矣乃復梗塞今漸老矣

一人曰仇潼東之中外厚結鼎鼎焉任重之器學殖萬

鍾室也至其執則太行回峻昆吾失銛

一人曰釋徵起宗秀抽南篠明寓西燈緯代之材委止
遐寂然如如之妙兼我五總龜而得得之功乏師一鐵
杖

贊曰予之京師求觀四方士恨未得得者獨三士焉然
皆先得者矣嗚呼

熊先生小傳

先生熊姓永昌名某字家鄩都之遙谿先生學聖賢之

道務求內以率性而外以鑄人近以達家邦而遠以理
百職統經綜史博擷羣籍舒為文辭如春熙水流陶鎔
性情寓發詩雅宛然唐風然而仕限於格半生儒教臯
比屢移徒使經濟之畧廣付四方英髦而未克出諸其
身雖然尼山萬世道祖厥勛被當年亦獨三月魯司寇
澤爾其教散于三千粹于七十功績乃度越官守百倍
先生胡少焉先生在吾長洲數年聲效尤赫上官繁推
薦今資滿當揚明于天曹宜必有大擢授近侍天子或

膏澤蒼黎功不止士類已然使非以資承疑可也先生
平日交友臨衆隨所地有建樹余生顛蒙受益殊弘當
別莫所為言聊述大概爾爾今天下凡於師儒職無賢
不肖貴賤密疏悉以先生稱稱而稱者指既屈如吾熊
先生稱稱者一人乎先生哉先生哉宜無間於天下

徐君墓誌銘

徐氏自宋汴京來靖康之難太學生揆死之而其父附
駕南奔遂定室吳縣西光福里是為汴河五府君子有

三傳至魯國初為殿廷儀禮司序班魯生拭拭生君君
美風儀喜自藻飾濶巾博褐須眉蕭颯引杖笑步林谷
如古遺民性閭朗不羈有滑稽之致然不廢生作家殖
既饒而務民之義賻死濟弱或至燒券以安逋客人疑
近名君無遷心焉晚年築舍萬安山傍飲歌其中其歌
曰息我之凝然寧息我之冷然既數年化去其子遵遺
志就墳焉先事與余友二朱君瀚良育來丐銘記二君
道君大致如右因從而文之君諱暘字仲熙永樂庚子

六月九日生弘治庚戌八月某日卒始贅新豐錢氏再娶于王子男三人進登順登縣學生女二人孫男女四人銘曰

維弘治之壬子十有二月吉日庚申封我徐君徐君遺志在嗣人樂哉君鄰乎青山白雲

周山人墓誌銘

山人周君諱琇字公瓚長洲相城人也先自汴來祖考達學偉文並晦處茆葦至君風操尤勁惡圓尚直不撓

爵顯生未嘗為譽人語也君期歲而孤事母朱氏不損
子理君嘗過市見金於肆知主之遺也呼出告之乃去
君學通楚騷經得三閭之幽旨平日所尸塾席如西莊
沈隱君貞薛涇劉僉事珏荻扁王處士錡皆故家賢主
相為廟切益學詩於沈學畫於沈弟小隱君恒而君之
室則又二君之姊之夫馬隱君鬻之女也弘治戊申十
二月某日君方擁彘而哦成七言天寒地凍阻歸舟一
句而卒其涼穠之興有寄云享年六十有九明年月日

三子鏞鍾鐸葬君本縣益地鄉新穴先事王處士為治石以書來曰公瓚嘗從我讀子文而喜之且曰吾平生寡知知惟公吾死得公序吾行得祝君銘之吾墓中吾且亡恨我固諾之矣子今日當無辭余不識君面而數從沈劉王諸氏微聞君今得王書悲其言而從之銘曰悲乎君君亡矣悲乎君悲匪君悲鄉人亡此侃侃風

處士金君墓碣

長洲金氏自宋元以來世以儒術承傳有曰繹與其子

劍劍子維則皆號名儒維則為四明陳先生子桎之外
孫沈處士良琛之壻而師毘陵倪元鎮為詩陳五經嗣
初銘墓稱其講學聞道習禮有容其詩直而不俚微而
不晦暢而不蕩異乎今人維則生允端忠信孝友家學
不衰所著有江村八咏盟鷗軒集娶樓宣獻公大防六
世孫生以賓與良琛啟南隱君為兄弟行少同事聲
律相倡和娶邑中沈公望女是生處士處士諱儀字文
表幼嘗業進士及長贅同里李氏無何婦翁死家向微

遂不克畢其業去治貨殖而不廢學焉其為人益良且
夜勞勤臨務好謀至謀決又有膽畧行之不貳故動無
債事家以致饒此其為貨殖者也孝則一息不忘其親
兢兢以忝祖為懼弟則讓先業於厥兄賓敬夫婦則不
畜妾喜靜而惡奢慕古而簡執雖居度容舍而尤慎交
不黨親賢遠俗矜持自愛或引觴獨醉熙然忘世有勸
出金穀為簪紱圖者笑謝去此其為人者也誦讀歌吟
家風宛然遣子游學善教克成此其為學者也正德己

己五月日以疾卒生天順戊寅月日年五十二一男子
曰岳郡學生娶沈氏孫男二人曰元嗣聘陳氏曰支孫
幼女一人曰元愛岳以明年庚午月日葬于某地手狀
請纂遺美于碑為述而銘之曰

體博逢掖聲中度律茲學之華尚在踐實百行敦脩斯
儒究職有煒金宗儒燿不息維容菴父功豐紹述文既
在茲室亦允殖尚有國光觀在燕翼文獻永徵君其瞑
息

顧烈婦傳贊

顧烈婦事在弘治九年良有司兩表于朝乞旌卹之以非常格所具議禮之旨未下於時閣老禮部尚書吳公特書本末而大夫士作詩美之累什余贊為贊激俗傳善期縣之不刊

人叅二儀氣運五靈大信崇節剛毅以行雍雍顧閨肅肅俞媛禮浸義濡孰教而善靈修疾革吾目胡寓即瞭無睹胡不即瞽抉之臥卧瞳則不脫以刃則割流血活

活左既不留右將焉求孰祝吾刃姑驚且休血窮精枯
絕矣而蘇冥冥索塗唯見吾夫碩人頎頎美目盼兮豕
睨狐闕曰人盡妻宛宛弱嬪萸柔不任握一寸鐵完萬
古心嗤高矐愚並伍縣忠惟房公妃千載齊風家風四
開王道無涯王道無涯表樹斯來

文林郎河南汝寧府光州判官趙公墓誌銘

公姓趙氏諱貞字履正其先河南從宋南遷至今為吳
人父倫刑部主事妣安人某氏刑部居官公侍左右少

儀謹熟嶄嶄若老宿父行見輒器異之前太子少保兵部左侍郎嘉禾俞公綱以子妻馬景泰中以善書授中書科中書舍人天順初改光州判官吏事亦辦息縣缺令長官檄往攝政輒四三年息人安之後有寇作部中公亦能殲渠魁釋脅從不違儒言已而致任歸刑部既先之矣父子復聚故里家庭斑白袍組輝照公益執禮養色衣膳湯藥朝夕子典不哀居二十年而刑部沒公喪如禮又二十年以年月日卒年若干繼娶許氏子男

四人淵淳深溥女幾人淳娶祝氏山西布政司右叅政
維清女即允明之姑也孫男女五人曾孫男女幾人公
之沒淵已死淳乃以年月日葬於某地倩為銘公性顯
執頗近狷舉措操槩墨不肯與時移推在光時識劉君
於學判異禮之劉果起進士授御史適按于蘇時公已
衰薄幸者以重賄來乞公公拒斥欲執于官終歲無毫
毛私其守如此銘曰

羌習禮而精書兮儒其藝亦申志而完名兮
騶其任蓋

金身口八ノ三
卷十七
君子無病無財兮病無稱於沒世使孔子稱公兮吾必
其士蓋聞諸子貢之間兮曰行已有恥

湯君墓誌銘

湯自宋世占吳籍為大族在元尤盛至君父彥祥克惇
德行慶娶楊氏生君及弟數人咸樸茂秣飭競亢厥宗
君諱濱字宗潤壯時以白圭之方充展家業水陸南北
歲歲無間程中年而弟渭出任尹赤縣贊宗府君與諸
弟更番出入君稍以休居當是時允明見君昆季交聚

堂寢周旋友于怡怡如也子姓數十伯人給侍左右儀
範甚安整君出則溫顏忠語恂恂市里間人莫不親而
敬之風致可挹也君性寬惇無矯貌龐而清多笑容所
存甚厚煦煦然恐一人不入其度中自鄉邦士大夫皆
多其為人君得子晚有側出一人曰琮早死君方戚復
得側出孿兒二曰長吉長慶又皆死君不能無悲於中
霑疾凡二年日就委頓遂以弘治元年七月二日卒于
正寢年七十有六其生永樂十二年五月五日也配袁

卷十七
氏甚賢有猶子君取之以子視焉名曰珪三殤子之未
生也君又以季弟瀚之子璽為後至是璽與珪以其年
十二月庚寅朔奉君柩葬盤門外鳳凰墩上新窆蓋君
所豫營也君嘗請先叅政記之而其子今以卒葬之期
來使允明續為銘遂銘銘曰

終有以慎而遠有以追君於此其無可悲

守齋處士湯君文守生壙誌

舉吳之族大而久者最湯而又善也舉湯之胤長而嫡

者最君而又賢也嗟乎有埒封之富不操籌而懸鑰有
囊智之才不棹汲而矛浙有明經之學不及用而不愠
也儂子錢十萬便買一級用耀妾僕君其不然布衿華
於烏章鄙夫見人一第趨拜車塵以結盟好我則異是
蜩枝暢於蠅附雲達漸鴻河濬伐檀不知老之將至亦
賢矣哉然而無怨鐘漏不諱窀穸長房柩杖從其自好
臺卿壽藏寔唯我師若夫端木之望壙季孫之樹櫛齊
一機也於是以弘治辛酉卜地筮位創為規撫正德乙

金少四八八三
卷十七
亥成真宅於城西

字 缺二

鄉教山之原時有今判德慶州

進士彭君寅仲大學鄉舉進士王君天文前後為記山
谿之勝椽隧之美粲然著矣余昨返初君旦暮過從一
日語我平生獨子知也深他時將乞銘吾藏非子為之
猶弗為為之吾不目猶無為者且古者陶令傳史輩故
有自為之吾假手於子子念諸余少君一年髻髦共筆
斫居第門相對又姑氏為君從嫂長亦同業率親故契
密無過君不為是其何辭君之先自江陰徙大父彥祥

用君叔父仕贈大興縣知縣考之輩八人曰順菴宗潤
為宗子嬪袁氏無出弟承事君宗大嬪徐出君為叔子
乃以為宗潤後宗潤卒無子故君為湯大宗之嫡長其
輩數百指指在卑幼殆僅千君資最秀雅始讀易治進
士後為家政執弗可兩遂置去稍循家素業往北都還
往齊魯徐宋間外為貿遷中攬收山河雄渾土風勁婉
多接士類耆老用以儲見聞博游趣充然也無何覺倦
游便歸安林澗調睦族屬族屬有疑紛扣請裁綜必沛

然與人和而不泛又善教子積書隆師用底于成又多
能儒術民義之外人間百事幹藝無弗尋究醫藥卜筮
命相天官地形老釋神仙之道往往通解然而弗泥溺
一端以障通塗性又至曠朗纔四十即舉務此其達絕
人遠甚其高行善履甚多前所徵其最者為作詩令刻
玄堂之砥壁其詞曰才通明兮氣懿淳倚梧秀兮鳳鸞
文業充融兮嗣騰騫安真歸兮先蕭辰枕蒼崖兮封白
雲壁來積兮更幾春吾與子同歸兮遲三紀以為信今

而往與君花時月宵攜壺抱琴相往來觴歌以玩西照
時取此辭謠而舞之亦樂只且君以天順己卯六月九
日生今嘉靖三年甲申閏世六十六年矣君先配吳氏
賢而蚤世一丈夫子曰儔自邑庠為太學生有文娶袁
氏孫男一曰科孫女三長館壻王洪于家次歸光祿寺
監事張汴次歸禮部員外郎陸尚德之子府學生焄孫
女二

懷星堂集卷十七

欽定四庫全書

懷星堂集卷十八

明 祝允明 撰

傳志

中憲大夫廣西南寧府知府蔡公行狀

公姓蔡氏諱蒙字時中其先自汝南徙汴曰世洪仕宋
為秘書郎直煥章閣從國南遷子太伯僑居包山後遂
為吳人數傳至仲簡國朝以人材徵至京未授官以疾
告歸生桂芳桂芳生景東娶徐得處士庭栢女是生公

年十一在鄉學父老舉于郡乞升邑學太守況公撫其首曰此子異時官當至吾位即補為縣學生三試于鄉不捷貢入胄監兵部尚書馬公昂奏以曹務機要上下疏牘所係不輕不宜專委胥吏當簡太學生文行明慎綜達時務者俾專司繕錄因錄其功以高其入銓常資詔從之公在所簡歷事僅半年天順甲申吏部校績優等授浙江溫州府同知階奉政大夫涖官勤養民惠成化戊子銀發屬邑泰順山中閩栝流寇羣聚來劫據山

曠挺兵殺傷遍野邑里騷動藩臬以聞朝命中使來督
官兵勦禦之賊聞兵且至焚野撤橋壘石塞要路候吏
馳報公時夜漏下二鼓公驚起曰橋斷路窒兵何由進
遽帥壯健五百餘人往撤石通道伐木為輿梁官兵旦
至乃渡會大雨雪不可進凍死甚衆衆議募民壯補伍
擣賊巢穴公請曰彼皆平民烏合覲僥倖之利非有團
固心苟益兵制其死命其勢蹙必衝突轉鬪屠戮更多
傷良民非計無若遣一職諭以福禍當免兵而戢矣中

使宣言于衆當從蔡同知言衆言固當從獨難其人其人將非蔡同知不可者中使曰然公毅然請行即深入賊窟落反復諭之賊感悟推其魁詣公曰民等愚惑冒干天誅公賜我數千人得生路敢不遵伏當就公前請餘命復歸事農為太平民語罷立解散兵休而還公復建久計取民之強勇丁衆者立為銀賦長領坑夫若干事採鑿取富殷者即坑側為廬舍居之俾禦寇各給糧餉事集而民寧焉樂清田數千頃為山潦衝嚙壞為沮

汝塲而公稅如故破產者甚多公往相地得水所由道
命因其勢浚渠築塍時畜泄慎防護田遂還為膏腴御
史藩臬咸上其事朝廷嘉之錫以旌異之典封父如其
官母妻皆宜人癸巳浙西饑上意有司不職命工部侍
郎曾公都御史劉公繼往綏撫兼覈屬吏減否存黜之
公聞命豫規畫積粟五萬餘石備賑貸及二公至果徵
粟於有司公舉而發之如發囊二公大獎異遂委公考
察府僚以至屬邑官吏公疏條某賢若某狀某不肖若

某狀上之二公多從焉於是注公績為通省十三府最將薦諸朝適公秩通滿赴天官而郡方缺守民日擁憲司言蔡侯當遷擢他土民等失慈父願為達天子借蔡侯守此終子我溫人於是憲臣偕藩省上疏道百姓意未報而奉政之訃自家至公奔喪歸戍戍起復陞任湖廣辰州府知府之任道間太宜人之訃又至遽馳還辛丑起復改廣西之南寧下車集父老問土俗拔弊通利民甚便安又以郡庶華夷雜揉易養難教特加意於是

三年俗成如中邦宣化縣民競渡誤死被逮入故殺律
連七人訟繫淹久累政不決公得其情即釋之田州府
土守岑浦驕悖不法與其族爭襲弄兵相攻殺傷人其
僚佐素畏之唯唯承附公獨往以直詞曉諭皆感服釋
仇其喜建事多類此久之疏乞骸骨得命致仕明年今
上即位詔致仕四品以上進一階公得中議大夫越七
年癸丑八月七日以疾卒生以宣德丙午八月五日春
秋六十八配沈氏生女一適馬某次室秦氏生男一曰

習女二長贅勞某次適徐某公之沒習始九齡諸婿相
之以某年月日奉柩葬于綺里穀堆山陽先事以公遺
行請予為狀謹狀

伊府教授吳公妻宜人鄒氏墓誌銘

宜人姓鄒氏諱某其先自江右隸赤籍來蘓父某生宜
人閏幼之日性氣淑靈儀則莊整柯斧者至父母輒曰
是不足以當吾女時鄉先生福建右布政使吳府君好
德有季子方游郡鬻即今國教公公美也府君既下世

公妣張夫人聞鄒女良令媒來以請鄒二親曰此真吾
所伺者立許之宜人既婦侑公事張夫人循職罄力無
怠時稱為簪組大族婦公釋褐筮仕為寧晉縣學訓導
繼擢岷王府教授宜人隨以居多將助功已而公以養
親得告與宜人奉張夫人還吳宜人共事尤備誠孝三
年張夫人沒協治葬祭咸中禮忼心公服除改銓為伊
府教授宜人亦偕行公性堅毅每在官遇事即直前為
之宜人往往調之以婉潤公於是得之為多平居御下

有制節而以恕行之至撫飭二子乃特諄切然未嘗傷於苛蓋其資度之良得中如此弘治戊子七月某日以疾終於武岡之解宇始生正統庚申十二月某日春秋五十九子男二人曰用曰岡女四人孫男三人女四人宜人歿未幾公遂懸車之請乃攜殯以歸明年月日葬於本縣城西北四十里烏龍山先域之下用以郡學生沈君漢昭所述事狀請為銘銘曰

坤陰之賦剛柔鮮克剛傷驕戾柔惟姑息允懿宜人溫

栗至中執之堅貞施以冲融勲章夫子恩榮朝國象服
命階完祉善沒奠魄故塋冥祥長發尚百斯年干邪載
合

蘇州府醫學正科盛公墓誌銘

盛在蘇著且久自宋相文肅公度吏部尚書章時則以
文學政事顯其後居蘇代有華彥而恒業醫至逮在國
初辟賢良有高節逮生起東有勁氣傑才且能文初為
郡醫學正科以其術徹太宗之知一旦召見數對稱旨

留近侍授御醫承寵顧衰然自見醫効亦竒絕太宗呼
醫中狀元時則以材諳奮御醫有十子及老復得公行
十一生四月而御醫沒遺命第六子汝德撫教諸弟公
藉以長立諱補字汝弼智識超特幹力雄敏少弱稍用
以立事亢宗家政有不足治廣而鄉黨裁疑發謀出必
邁人意表事效沛如成化中丘公來守郡郡缺醫正科
有薦公於丘公丘公固信重公又公兄汝愚丘公同年
進士也即奏以授公公既仕所以攄達猷為鋒銛而鑑

瑩囊畜而輾轉時則以幹用鳴故論者謂公稱其世然
至施其術以起聲立其節以正物者猶有述焉西江醴
賈倚丘公鄉土中郡中駟以法駟衆斂百金壽公乞解
公曰吾利也而公蠹丘公法私負丘公知吾不為駟去
更屬一時宦時宦祝丘公更峻其語丘公益怒將重其
手會丘家人疾召公丘公道其事公曰駟固當辟自有
常刑如以迂重之法不平抑將非公鄉井利丘公意解
就末減駟知還饋公金竟却之徐氏二子父死訟論財

其少內五十金請公助公言若理曲能倍金吾為若處之少倍以進公召其長數曰而父骨未寒而若是不戚咈父東冒鄉邦覩邪然而窘而弟少裕吾諭而少少裨周若得否長感泣即以金畀之二子遂寢訟睦如初大商與郡貳姻匿稅公帥部人發之論如法周氏子負博進懷寶玩質錢約厚息公以交其父謝去語父亟收治行破君家矣父感從而免袁養正先富後落妻病心殆袁持金求治公曰君婦用貧病復減金以加病乎辭而

子之藥良愈汝愚登第而沒養嫂撫孤為植業二十年無怠王氏婦病衆為陰虛治轉甚公視之曰腹瘍耳令其夫按患處痛殆絕灌以潰癰藥數日已王端毅公撫江南得疾臥南京衆治以痰結郡守劉君進公往公視謂疔也從而瘥暢侍御當暑病寒被數重裘裹衾悶謹室中不勝冷或治為傷寒後邀公公望而切之所謂熱極似陰是為中暑啟室褫衣被塗以搗葱進香薷湯一啜而蘇再索食三病已尚書似公患風蹶公飲之藥酒

金少府
卷十八
盡三石起似與冢宰馬公吳文定王文恪二公羣薦入
太醫辭以止公頎體疏髯談議辨亮一時名卿結納徧
四方略如鄭當時位官守行其志者四十年得子亦晚
既踰六十舉其猶子早以自代遂致仕別號春雨以見
志業豐享西景又數年子曾長早致仕還舉以代焉凡
所述公才行述業如右皆其甥朱臣所為狀云然而狀
所舉猶多狀不言言於鄉人者亦更有之公既沒其子
曾魯奉狀請予銘墓子少公二十年幸交忘年憶公嘗

語予吾盛在宋姑未論元及國初皆業醫而根儒時術
人視世墓謂後來宦顯雖不絕儒醫之中殆充棟今吾
幸不落吾所望者不願子孫以時宦易世儒也予恒念
其語為可傳今亡矣夫公生正統辛酉四月十七日卒
嘉靖癸未九月五日享年八十三嫡母顏氏生母沈氏
配吳氏繼陳氏子男三曾出鍾氏娶劉氏魯出缺一氏
娶李氏昔娶陸氏女七長適常熟章沐次適即朱臣次
適曹鉞徐欒都鉞次許錢坦其一以疾廢不行先卒孫

卷十八
男七女四曾等以歲甲申某月某日葬公於吳縣某鄉
奇禾嶺新地銘曰

成務者才運才以智好謀則獲聰作斯貴赳赳其才析
糾合戾華先腴後康身行世英英之智依仁比義握機
中縈鈎深挾祕通躅鄭莊辯諧木賜發強我任曾不訕
氣從政之譽展也孔氏既達而果或益之藝庶幾三賢
殆其近是世獻之徵永言銘記

散官李公并室太恭人高氏合葬誌

弘治初朝廷有骨鯁之臣曰監察御史李端以直道事
上後竟坐左遷既十三年上察其賢即所任簡授廣南
知府命出于廷而君之二親前散官府君洎太恭人四
月之內薦繼奄逝家人前後以訃至部符亦降於是君
肅戴新旨面闕謝恩訖遂奔喪歸瀕發以二親遺行授
太倉州學正甘仁夫輯狀投允明為誌將刻石以掩幽
按李氏襄陽棗陽人府君諱和字介夫其考曰某妣曰
于氏生府君七年而孤賴母抱節撫鞠酸情苦力相與

為命每教府君以保身務生亢家之方詞旨悽懇府君性質天美弱冠遂能承訓勤確共造其家於荒蕪之餘時同邑壺關令高舉有女五姐德容周淑府君求而得之是為恭人凡府君於修齊典法罔缺而恭人猶能賓敬勗事逮下多惠非祭不踰中閭雖老不廢內紅已而諸子婦孫集數百指府君恭人撫御均洽臨蒞莊肅遣太守遊邑庠其餘因材授事太守果登進士宰宣城府君恭人心期高遠嚴誨不弛宣城政譽騰溢乃有風憲

之拔入南京江西道尋謫永寧宣撫司經歷府君恭人
猶且賞其往而厲其來云已而遷知石泉又改富順丁
巳國家立太倉州拔知州事三年載有專城之拔而忽
銜恤矣時年既耆傷毀怵迫猶在孺弱據狀府君生以
某年月日卒以辛酉二月某日年若干恭人生以永樂
甲辰五月二十五日卒以弘治庚申十月庚寅年七十
七子男十一人太守長也次靖玘竝端翊斌隸溥紀增
女二人歸丹咸已嫁娶孫男十七人汝工汝式汝經汝

器汝貢汝賢汝贊汝資汝質汝寶汝梅汝全汝辰汝佐
某某工經補縣學生女十四人曾孫男三人糾孫言孫
諫孫女四人卜以某年月日合祔墓在縣東北祖塋之
次銘曰

華望維李芒寒列史太守曰冰柱史者耳勉寔尊朝絃
無紕勢重光昌代廣南爍矣前鍾後發緊若考妣粉榆
勸德絲綸列義甘棠古栢陳根之自恭人好速徽音世
嗣思媚于承式穀爾似閔丘無塵風號露涕山輝霄燭

銘詩斯在

方承事墓誌銘

餘杭方氏宗唐玄英先生干始祖叔恭宋寶慶間從嚴
州來通判臨安其子榮遂占籍焉至將仕郎勝為元太
平路當塗縣主簿承事其玄孫也父曰讓承事行十二
諱祥字彦闕家故饒讓宣德中以掌稅事没于京承事
方幼稍長母舉存篋并珮珥畀使營殖乃以之積粟貸
人而取其息贏轉遷之然取不過制又輔以寬慎既發

粟歲大侵在在病田其所流布在白社萬石仙宅諸鄉
間輒復稔見者從而繼貸其地即轉之他鄉他鄉亦輒
復稔諸貸者異之曰此天富方公也又樂其息薄竟無
負者雖逃亡亦獨償之而後去且以其貸地卜豐凶焉
既獨執淳實不欺以為利而果以自得所向罔弗獲業
復舊而益熾猶雲烝泉湧然所執愈謹其效亦不忒往
往質諸鬼神靈岳寺僧貸金去已而死其師無償意忽
其小沙彌發狂作亡僧音奮迅白師言弟子前以某費

得貸於方長者方長者則何可負何可負師乃歸金嘗
買山於古城山主朱氏既畢事朱復誣謂未受直與其
徒三人邀議於山舍承事弗校即更與之第指天矢之
曰吾苟負若出門即死于虎若負吾若死於虎朱出門
上馬已覺體戰栗轉顧虎突來攫其騎啣其鬕承事奮
呼舉火燎虎虎乃釋去朱以緼著厚得不死乃自訟而
語諸人其他動與吉會非一端一日黎明凌霜過潘板
橋橋布木狹而脩下瞰湍流甚險行將半見彼岸縞衣

偉男子大言梁斷矣勿過因即返候明桴而渡視梁果斷霜路無偉人跡意村叟也訪謝之通村無此人而旁有周赧王祠疑神助每過必入拜焉又初生之久家人見產室外火如斗旋轉不休比產乃没又初由葶山徙石闌買居葺築之見所題落成歲時即其生之期也每宅心惠濟或乘馬經行畦澮加馭銜勒不使齧一穗并回戒從騎謂穀以人若牛力而成是奚以供馬或誤觸覆負戴者物須下馬慰謝問價而償之鄉井急難赴救

惟恐後時公家有一事厲衆往匡植之至厚糜金粟弗
厭衆既推服聲聞於上郡邑藩臬有賑卹之政必致諏
議承事為調酌動合機宜而首自輸助族雖蕃裕不以
及之丁酉之賑尤厚是有邦秩之賞平生孝廉好禮燕
居雖袒裼無惰氣交納益友恒遠暴慢稟姿矍而精勵
脩眉茸綠意度明爽弘治庚申十二月二十一日以疾
卒生宣德辛亥十月十七日享年七十母顏氏生母朱
氏配郎氏子男三長乾善書次坤次翼皆治易為邑庠

生女一適郎瓚孫男六曰鼎鷲漢冕似龍世隆女三三子以乙丑十月二十五日葬於舟枕山北麓新塋先事坤列手狀謁予請誌予雖未識承事面而承事不予外曩遣坤翼從予受經竊喜二子之英拔而謂承事之宜食其報也此隔歲不聞問而承事已矣惜哉銘曰

大郡維杭大姓維方達於家邦於爍竹莊胥矣富人服義冠仁薄之如雲益之如春誠孚表裏信格鬼神申祐于來其祉藹藹白駒在谷風塵不辱清揚祭兮霜梧雨

竹牕牕舟枕長奠幽寢雲封松蔭其樂孔甚三雛翹翹
殊有鳳毛載灼公華將翔將翺

王衛使哀辭

衛使王氏字廷瑞其人恢濶義惠業阜而持以謹勢順
而發以和在名理事力可到者輒力為之以是數者集
其躬故遂為偉夫吉人如其以財助國錫爵則歸于忠
事親有禮善述則歸于孝交友會文輔仁則歸于信斯
三者又其立身亢家之本也歲十月余遊淮楚寓其家

君已疾攜手傾倒數日余歸不期月而訃至哀其人積於中泄之以辭其大行見諸狀誌稍撮布焉

元化幹流兮結靈調人世善積邁兮誕胚令醇繫子之室兮亶富有宿媿子秋秋兮厥承以穀勺象適舞兮喪其妣焚無違兮里觀禮繼考徂兮益用情志事述兮不改其政加以廣兮義茂成肖聖哲兮像于廟成室家兮仁無告藥厲病兮飢饉莩樵而冢兮救焚暴鑿邑井兮築梁道已逋責兮釋竊剽既利小人兮曷贊君子文武

之籍兮屢鏃文梓賓從并兮酒有旨尋奕射兮游圖史
禮樂交兮于胥喜居有養兮繼有子胡不適兮忽其逝
氣披披兮信大機糾錯出入兮何必絜齊淮湯湯兮亡
沔期為君哀兮亦為熙榦其棄兮聞斯詔

王氏招魂

代唐
寅

魂歸來兮毋四方些東沈弱波漂溲桑些西邁虺虎實
虐腸些祝融灼肌南沸湯些玄冰沍疊北裂肪些魂歸
來兮毋上下些層關沓九入亡罅些

缺一
字

淵洄泱出亡

駕些魂歸來兮毋趨隅些
荒土無通蒼門墟些
衆安沆澤陽之間些
火土丹澤沙所幽都些
千沴萬害不可以居些
魂歸來兮入淮陽些
故土之樂安靡彊些
重城複湖渺翠蒼些
喬閣邃堂綴洞房些
食有八珍服有五章些
帶金冠紗奕世焯煌些
耳諧絲簧目丹黃些
青編積架古圖懸墻些
嘉賓日合飛清觴些
燕歌趙舞妙不雙些
優游夷羊懌悅靡方些
魂昨去兮直來今
淮之陽兮江之陰
戎極目兮毋傷心

朱守中家傳

多澆風而長厚為金玉寡文學則藻雅為麟鸞鄉里不
得終仁士友弗獲全益乃亡朱守中守中既亡余從京
師宦南海歸即遷左畿郡不遑往哭之無何返初守中
嗣太學孔年來修繼好孔年亦時名士余也弔慶交懷
無以答亡友既用不自己立纂亡友遺美參采邢處士
參所纂墓記為朱守中傳授孔年并入家牒遠久知守
中名尋其行者可從其家以斯文得之守中名正字守

中朱氏世居吳郡葑門之郭富而穀之室也至守中特
高出族里為稟仁而秀孝於親令於族信義於朋友蓋
惇於五品其最善也優文藝而良醫藥其餘也始守中
生未彌月失父母華節婦守之世父瓚鞠之九齡從里
師金孟愚授讀甚嚴守中亦甚敏且勤成童時都少卿
玄敬未仕守中宗人堯民致主家塾守中往從之雖指
授與衆同守中每見推於是時使入庠序捐家政一力
科舉業其大成沛然當大振揚華節婦與老姑謂久大

之家盾遺獨但守中單然一綫綴世緒愛其軀不遑愛
其志俾得遂也然而守中居常慷慨恐落其操尚讀書
為文辭皆不少勸廢詩律嚴密字畫秀潤知者珍愛之
守中性最倜儻頗尚信義周恤人急發篋如拾芥意結
納還往名卿滿座過金滿堂也而余其最契協燭照肝
膽者弘治中余當往京師不忍別為言留貽之曰余觀
物之稟良于天也而用殊也可勝道哉世多為咎于人
嗚呼天也今夫玉地理色澤不相遼為璣衡與天為徒

等而下之極至為含於死愚人以晁腐同歸又若同作
器飾或賢人小人貴賤重不重不同用之又若並雜惡
石抑揚倒錯施置其悖亂何如也今夫以士入衆庶而
商農且獵而仕獨且奈何哉余守中璣衡玉也亦彫於
玉人已而今在野余接之良粹之氣充充爾嗚呼余觀
今人妄庸顯而尊盡凶礫也以視余守中獨且奈何哉
吾茲當與守中別相為言之嗚呼守中毋以繆亂而敗
修矣抑或當有後期既而守中終戾契於時然襟素浩

然適陶然樂也治亭圃泉沼種樹畜魚鳥謂之僻圃日
坐所謂碧沼軒玩物養性吟著日富所為書有詩摘要
僻圃吟稿其舅氏醫也守中以餘力攻其說遂至超詣
往往治人取竒效郡縣因以名醫應詔徵起之守中雖
籍于有司未行正德辛未為督上道與張揮使延德同
舟延德道病瀕死守中一投藥即甦他醫謂專門無此
見也既至以母節未受旌典辭其事以歸壬申病傷寒
纔三日自切脉云吾何死之亟邪涉旬果卒僅四十三

歲爾守中長洲人父曰琳祖昱有孝行代父戍南京受
知王靖遠以青不及用歸

嗚呼世澆夫務碩苗者多涼德有克富穀交培而嗣者
安之不能學也或學而仕示其來以侈儼率如是亦自
詒感守中藐孤承先豐室而以學華大之又能使孔年
襲休其不謂孝子碩人者與而孔年亦難能矣乎余少
嘗述交友為金石契其時守中且幼無守中守中且刻
之木以其後量之書中人及守中者幾何余適謂當與

守中罄皓顛躄曷至是也故繁辭以傳守中非以守中
情誼云爾

施處士哀辭

施處士以其道昌其生安其死於吳興死後子起家進
士將崇烜於時其學將皦然樹丕暮弘勲一驅古人列
處士於是食享不可量強其本道自茂哉處士邁于澗
阿雖持賦集政于公繇縣官辟之事已皦然去曾不終
列一主捕魚司水防吏曷道之云謹身而剛亮有執于

其家孝孝弟弟慈慈鄉則賦平惠流焉此天之能政者
何必政于笏綬中曰道乎哉夫以道既行不罪于天則
可哀以道可政于笏綬而否亦可哀哀其道不哀其身
人誰其不死如哀其身則進士之道也為進士友并為
哀其哀亦無侵哉處士名某字某進士名儒字聘之吳
郡祝允明為辭

秉高明兮履中直展貞亮兮洵堅特既績粟兮又坦平
施于家兮奚為政長願其為幼兮卑願為尊內不怨兮

外稱仁誼蘭馨兮操松茂剛柔節兮玉鉉宜壽厥不壽
兮哀則那孤之奮兮傷如之何孤志學聖兮尚賓王政
由求兮文偃商教誠善兮躬自道道曷哀兮哀孤孝若
湯湯兮雲瀰瀰升蒼蒼兮天目天倚魂為山兮氣為水
儷深高兮共無止我有哀兮哀有辭公知不知兮知將
我啗蹇諄諄兮徒噓唏

侃齋徐公墓誌銘

人之於天也碩厥受矣而護固之條遂之不傾於既構

焉則盈厥享天之於人也。扈厥初矣而視聽焉而消息焉而應焉則羸厥終惟天人之際不可欺卓哉徐公斯其驗焉公之先從宋蹕由汴移吳之常熟至省八公理為元海道萬戶佩金虎符生恢祖居邑之漁梁以開緒立業生舉舉生德賢德賢生訥字敏叔益以豪偉聞生八子公行四德賢敏叔皆以侍郎恪恩贈通議大夫都察院右副都御史德賢配鄒敏叔配周與公生母張皆贈淑人公即侍郎之兄也諱懷字公允性溫而慤外簡

而中穎外柔而中毅居度充舒有父風而自持嚴重不
喜諧謔讀書執禮署其齋居曰侃即其守可見矣初敏
叔富且好禮嘗作家譜以聯族屬又作同居集以示省
勸公恒曰欲不作為人視吾考欲不作吾考視家集以
是握心厲行期以副之率所履務循繩墨孝友為政閭
閻肅然鰥居殆二十年而不畜妾媵惟命兒孫温足小
蒼頭事饋食耳弟公度攜家赴湖廣長寧令為之營室
治田俾勿壞及侍郎公肅初仕四方亦為理田宅如視

長寧平居與人誠信熹周振割田助宗人空急鄰有孕
字迫凍餒畀之薪米以全活病不能致醫者市藥作丸
劑審而給之衢杠壞病涉輒為整葺遇途丐隨予之穀
粟初自漁梁往鷲山山西有隙地因買治為塋貧死無
棺斂者量相之使瘞于是成化間應公家興發拯飢遂
被冠帶之旌然自奉又廉約邑令長舉從鄉飲不往逮
高年稍一出主賓位便謝不再赴前令楊侯乃致饋于
家人謂其交稱也日月益隆而自修不衰弘治癸亥二

月十九日方坐堂上命觴子孫進牛乳酒飲一卮命冠帶服之復端坐而逝其生永樂甲午十二月七日享年九十配王氏賢而先卒王文肅公撰銘其墓子男三人曰紀曰維亦皆先卒曰緗女二適趙偉許浦孫男十二人珙琥瑠瑤球瓏玳環璫瑞珍玖女六人皆有歸曾孫男十二人文恕慈惠恩德愚佷健俸餘幼未名女十三人悉幼玳郡學生文邑學生緗卜正德元年十二月十六日舉柩葬陸臺之原即王氏穴以祔先事奉塾賓夏

元玉狀來徵銘嗚呼公之生壽而富好德考終多男子
如是也其得諸天信亦盈而贏者矣夫贊之銘曰
視應而全視全而延曷不應之而以全以延茲銘也以
天仁不侵富義不妨利曷不務之而以富以利茲銘也
以世惟天惟世其不爽也若影與形而以徐徵惟徐之
徵惟徐之銘惟徐之勸徐勸亦弘

袁介隱誄

袁出濤塗世望寔都逮于建初有倬司徒雪僵昭操日

愛興愉世導而流有匯于吳萬戶五傳乃及夫夫凶割
夙鍾舞勺哀孤上無二親下有兩弟屹如成人山岳其
氣維持家觀勤渠生計綴旒之織頽網攸繫維織以堅
繫則罔隊駑矣俞翁鑒茲美器妻以愛息聿來館贅益
懋益力焦晨惕夕如川斯楫如吹斯翼既亢哀宗亦弘
俞室義惟制事仁斯愛物甄甄幼季眇焉無因左挈右
攜迪爾成人嗟嗟凡子二孺其貧比爾居廬完爾婚姻
棠杖其華鶴鶴在原何以方之張仲君陳家澤允瀦餘

波肆潤爾乏印振爾負無問有負而惶乃計行逃曰其
來歸印不女困女曷不信歸爾劑券善積欲餘祥來式
符家肥業腴翹然三雛伯也其士雍穎涵濡帝曰善教
往職師儒仲季克家幹父用譽承顏善志並玉環除天
迴地游玄造靡凝無始不終無平不傾倏然還化大耄
之齡嗚呼哀哉公有誠德侃侃悃悃尚絅其質如弦厥
直爾何嚙沓印不爾惑今也則亡脂韋臧臧公有敏材
獵綜羣史堯夫喜吟子雲奇字歷代治忽人物臧否貫

弗鑑別祭然掌指朋來樂意今則亡矣公有隱節執之
以介始從官勸分羸拯憊輸我廩廛卻爾冠帶載遭渙
汗賜級耆艾公亦曰辭匪我之惠褐寬終身其榮則大
霜松雪竹鴻冥鷗邁穆然清風今其安在日月弗居住
則玄墟靈旗風薄發引須臾考行抉潛揭我華書校厥
燕翼以廣州間

吳羅公壽藏之銘

羅出祝融妘姓周末國為楚滅子孫因以為氏歷葉有

人至宋通奉大夫兩浙路提點刑獄某生壽山為平江
錄事因家于吳壽山生聖儒聖儒生迪功郎謇謇生黻
黻生瑩甫瑩甫生公約公約生仲華世守儒術而家饒
賢積號金銀羅家仲華生感字守信國初以賢良徵不
就寓業於醫生肅字原敬修身繕性克紹父業而歸心
玄寂配許氏乃生公名繹字文賓少將學為仕以家落
去與其黨楊公玉同服賈無幾時視所入利越常算公
玉疑有未歸人者相與檢校數日無有也始分取之公

玉因道諸人羅君殆所謂天富善人者後其興乎已而行貨京師一往後不能遺其親乃不復往居殖益雄四方商日集為貿遷公為裁平物價既乃曰吾寧能為老馭謝不為性孝弟事親盡理婦馬氏有容德而失意於舅姑公曰訓有之矣子甚宜其妻父母不悅出竟遣歸其家後馬父迫馬更嫁馬不從以死徇之公之母乃悔命公祀于寢公亦不敢違也馬既沒同里周參議欲納為贅壻公曰周公女出富貴安知非庸奴其夫而傲舅

姑者吾不能向人喉下取氣也謝之其高亮又如此初以兄疾門戶事多自持之十年費六百金皆自其力後分爨不校但指其居曰此先人之廬子我數椽遺子孫足矣親沒竭力喪葬不以累兄曰親亡自應葬兄勞自應代吾不知其他脫獨生我則將誰歸歟聞者避之兄感動友愛彌篤兄子疾護視醫理至廢生業持身周慎行必再思取子務當義雅尚含容多所施濟江西廖某誤遺金二斤有半訪而歸之又清江客遺四鋌復歸之

客請留一以酬德公曰吾不以義顧不以四而以一邪
竟卻之或竊帛數十束為他人發之公曰非吾帛也鄰
人築室稍侵地或請語之不從曰語而不從則當訟之
傷鄰好矣且訟必橫費曷若以質他地無幾鄰竟售居
於公家落時嘗受惠於妻兄姜仲安姜没子且寔乃居
之室給之貲死營其喪比葬又買田以給其祀官修築
閭門埤及麗譙及越城通濟壽安諸橋皆屬公董役具
著勞助壬子歲饑官勸分既以姓名應之得賞級俄而

里正復以其字聞縣令史君致之來公持檄白令云云
令笑曰此義事能重應之乎公曰然復輸之令復與檄
公持二檄詣巡撫都御史佖公謝曰民志不在簪組請
辭佖公曰國恩也不可公乃受非大禮典不之服焉公
於儒醫龜卜陰陽釋老皆能通之游玩博奕絕于身家
積書以教子孫勸督勤厲食指八百禮齊法守閨庭肅
雍與人誠而和或就諮議忠告善道不良飲而盡人歡
莊人文士多樂與交然不喜趨附郡致鄉飲酒數往後

乃止曰吾恐以數取慢耳年既高豫治壙於武丘鄉花園浜先域之次以屬子銘因為序而贊以銘公配初即姜與馬繼以周及吳朱二側室所生子曰節周出娶王曰良娶劉頤娶楊皆吳出初子未生時有表姑之孫德良孤貧無怙公助育之今名謙娶唐氏女曰咸朱出適高麒孫男五人曜娶朱曉娶徐昉聘金煦聘陳昇尚幼女八人曾孫男一曰正孫女一人公以宣德癸丑十一月壬寅生今歲行庚午年七十有八彊健如壯夫其銘

曰

凡壤之貴視藏以卜美木嘉穀兼金良玉人滿九土幾
何不辱艱哉善人恒百而獨公則罔艱仁至在欲懿茲
膏墳將俟韞匱日月其徐大寶於伏宜曰仁丘謚爾陵
谷

劉介翁墓誌銘

介翁劉氏諱某字希福其先沛人始祖某仕宋某官居
汴京扈國渡江再徙今吳邑世承仕學曾祖文昌祖景

賜父宗美母陸氏贈監察御史繼昌之女介翁生有高
志性喜推予自其幼已然既長讀書崇禮不慕聲利雖
身世戾契未嘗詘已干物務義事不視盈歉為盛衰有
於氏奴竊金一篋來投乞收匿以侍叱不內復喻主奴
恩義奴感悟還於於王福歲除夕為市易誤贏金數兩
追還之且戒其勿怠途行得遺悅囊金鈿止道傍以俟
俄頃女奴泣而來訊之實也即昇之去時方飢家無贏
儲馬客徐州時同邑葉蕙病疫同邸皆引去為治藥省

視久不勸蕙賴以起見人事紛揉循理辯論枉直排羣
譁弗顧皆嚴憚之或勸非遠怨計即作氣曰天下之理
直焉耳吾寧能辟怨以畔理人更歎服每多諮決焉見
崇飲荒逸者惡而斥之人方以陶士行平生服食整潔
不惑左道示其子曰利害二言皆非義所校然臨世不
可不特慎於是苟利顛於己害必歸於人惟應以義公
好惡則寡過矣與鄉人少者語亦以是病革時聞有讀
時臣直諫章疏猶呼子聽之曰作人如此庶幾無媿與

其方亮合道每如此也生景泰癸酉八月六日卒正德
丁卯七月七日春秋五十有五配章氏子男二漳浣女
一適陳言卜以某年月日葬本縣下倪村祖塋浣文業
豐茂當益大翁者手遺美來徵銘嗚呼以義而廢利持
正以裁枉斥荒推其有以續匱皆斯世絕難事君中歲
以介翁自命於是信然銘曰

古有黔婁一髮無苟亦有季路生不迴口往者其難今
莫復覩有重吾邦繫子劉子其義近婁其直近季介哉

介哉古之遺美

處士丁君墓碑銘

丁氏世居常熟柴涇村號柴涇丁家其先出于汴曰良
之從宋南遷蒼黃師燹間譜誌狼藉故其先後無徵焉
迨子敬生仲玉仲玉三葉曰望山望山以義賑賜級娶
同知濟寧州金和夫女迺生君君諱森字元秀天賦豪
邁少時志規仕顯後弗克業性孝友望山有別宅在廟
涇村去柴涇數百步君既壯使居之君雖承命去每晨

夕返親舍定省不廢子職且恐承事來視日具膳羞茗
醴謹伺之至則安奉侍養愉愉終日素情固樂放逸比
在親側輒斂語攝體不敢少肆一食飲亦縮縮不求如
意時序敬修祖祀意氣惻怛平生倜儻自命不為瑣尾
態居度雄濶意尚華侈未嘗逐逐利殖間見人有務儉
固者曰貧富天也人生貴適意何以自苦為乃盡出所
藏飾垣宇葺梁道令恣新麗肥鮮綺紈未嘗離口體既
以身不遂士業比得一子喜其頭角巉異曰此足以畢

吾志矣遣從師游日夕督厲成業或乏束脩以上即粥
田以繼之得賈徑歸之師無少留吝曰寧弃吾產無寧
弃吾兒云其後產益薄然益浩然若罔聞知丁既素為
鄉曲尊信人有小不平往往來質君獨以仁讓宅心睦
于家遜于邦以是寡怨凡質成者獨不肯與其事毫髮
無苟取焉嘗署其堂曰種德以見志又以家占虞山尚
湖之勝放情杯觴以恣真賞世紛一不經懷因自號尋
樂居士然竟以酒致疾淹頓牀蓐踰四三年弘治乙卯

八月十日且革無戚戚色呼其室曰來吾與汝別矣呼其孤曰成敗由爾非吾事矣遂瞑年三十六後二年丁巳葬于虞山邵家灣又十年而孤起進士為南京吏部文選司主事思暴君善於碑持事狀以屬允明乃摭列而繫之銘孤曰奉也銘詞曰

虞山崔崔尚湖洄洄傍有隱君長眠化臺維此隱君豪澗之材意拔羣夫氣游八垓彼哉鄙人斗筭為儕珠璣盈頰糞礫在懷隱君曰嘻取類奚乖人生本適何自枯

之有美不御積筭蠹灰華堂錦裘有金且揮蕙殺蘭蒸
名醴滿壘山光湖波笑口日開彼世是非晚賄集菑何
有於吾衣不可埃乃養于尊乃訓于卑破產贄師產罄
亦宜玉芝不培豐稷奚為芝也克榮三秀歲蕤彤蓋王
庭瑞慶大來尚有崇階絲紵褒貶淑矣隱君終耀亡涯
自厚其生樂只有骸大閑皎然自作宮祇式薦嘉名宜
曰達哉

懷星堂集卷十八